



Fidoyilik —
Vatanga xizmat demak!

2025-yil 22-fevral, shanba,
22 (24.048)-son

O'zbek xalq
maqoli

Yurtni
dedim,
yuzga
kirdim

Zarafshon

1913-yil aprel oyidan chiqib boshlagan



www.zarnews.uz https://www.facebook.com/zarnews.uz @zarnews_uz https://twitter.com/zarnews_uz



DEPUTAT SO'ROVI SAYLOVCHILAR FIKRINI IFODALAYDI

mas'ullar unga e'tibor bilan qarashi lozim

21-fevral kuni xalq deputatlari viloyat Kengashining navbatdagi, yettinchi sessiyasi o'tkazildi. Sessiyani Kengash raisi Sh.Negmatov boshqardi.

Dastlab deputatlar O'zbekiston Respublikasi Prezidentining 2024-yil 29-noyabrda "Samarqand viloyatida investitsiya va tadbirkorlik muhitini yanada rivojlantirish hamda aholi turmush darajasini yaxshilash chora-tadbirlari to'g'risida"gi qarori ijrosi yuzasidan viloyat hokimining o'rinbosari – investitsiyalar, sanoat va savdo boshqarmasi boshlig'i O.Hamroyevning hisobotini tingladilar.

Qayd etilishicha, mazkur qaror bilan O.Hamroyev rahbarlik qilayotgan kompleksga viloyat uchun muhim ahamiyatga ega 18 ta topshiriq berilgan bo'lib, shu paytgacha ularning 6 tasi bajarilgan. 12 ta topshiriq bo'yicha ishlar olib borilmoqda.

Jumladan, qarorga ko'ra, joriy yilda 1,8 milliard AQSh dollari miqdorida xorijiy investitsiya kiritish va kreditlar jalb qilish orqali 129 ta hududiy investitsiya loyihalari amalga oshirish hamda 850 million dollarlik mahsulotni eksportga chiqarish belgilangan. Loyihalarning choraklar kesimida tarmoq jadvalari ishlab chiqilib, loyiha tashabbuskorlari, tijorat banklari hamda Investitsiyalar, sanoat va savdo vazirligi tomonidan tasdiqlandi. Bugungi kunda ushbu loyihalarning kunlik tarmoq jadvalari bilan ishlab chiqilmoqda. Shu bilan bir qatorda, viloyatda investitsiya loyihalari bilan manzilli ishlash bo'yicha tarkibi 21 kishidan iborat hududiy shtab tuzilgan. Yilning dastlabki oyida 33 ta loyiha bo'yicha 101 million AQSh dollari miqdorida xorijiy investitsiyalar va kreditlar o'zlashtirildi. Belgilangan eksport rejasini bajarish uchun 100 ta yangi korxonaga jalb etiladi, an'anaviy bozorlar o'rniga Yevropaning yuqori qiymatli Germaniya, Fransiya, Italiya, Buyuk Britaniya kabi davlatlariga eksport hajmlari oshiriladi.

Shundan so'ng viloyat mahalliy budjetining 2024-yildagi ijrosi bo'yicha viloyat iqtisodiyot va moliya bosh boshqarmasi boshlig'ining birinchi o'rinbosari B.Mirzayev hisobot berdi.

Hisobotda shuningdek, soliq, aliment, kredit va kommunal xizmatlardan qarzdorliklarni undirish bilan bog'liq holatlar haqida ham batafsil ma'lumot berilib, yuzaga kelayotgan muammolar ham qayd etildi va ularni bartaraf etish yuzasidan deputatlar tomonidan taklif, tavsiyalar bildirildi.

Deputatlar davlatimiz rahbarining 2024-yil 29-noyabrda "Samarqand viloyatida investitsiya va tadbirkorlik muhitini yanada rivojlantirish hamda aholi turmush darajasini yaxshilash chora-tadbirlari to'g'risida"gi qaroriga asosan, Past Darg'om tumani Chimboyobod mahallasi hududidan "Urgut" erkin iqtisodiy zonasini DUK-ga doimiy foydalanish huquqi bilan ajratib berilgan 234,3 gektar yer maydonida "Pastdarg'om" maxsus sanoat zonasini tashkil etilganligini ma'lumot uchun qayd qilib, maxsus sanoat zonasining bosh rejasini tasdiqladilar.

Sessiya kun tartibiga muvofiq, fuqarolar yig'inlari raislari saylovi-ga tayyorgarlik ko'rish hamda uni o'tkazishga ko'maklashish to'g'risidagi masala ko'rib chiqildi.

Mazkur masala yuzasidan O'zbekiston mahallalari uyushmasi Samarqand viloyati boshqarmasi boshlig'i, deputat Sh.Yo'ldoshev so'zga chiqdi.

Fuqarolar yig'inlari raislari saylovi-ni tashkil etish va o'tkazish tartibini yanada takomillashtirish yuzasidan amaldagi qonunlarimizga kiritilgan so'nggi o'zgartirishlarga muvofiq, endilikda mahalla fuqarolar yig'inlari raisi vakolati 3 yildan 5 yilga uzaytirildi, dedi Sh.Yo'ldoshev. – Bo'shab qolgan o'rinlarga ham fuqarolar yig'inlari raislari 5 yil muddatga saylanadi. Ilgari fuqarolar yig'inlari raisi saylovni tashkil etish va o'tkazish Oliy Majlis Senati Kengashi tomonidan tasdiqlanadigan respublika komissiyasi tomonidan amalga oshirilgan bo'lsa,

endilikda bu vakolat Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar Kengashlari tomonidan amalga oshiriladi. Ya'ni, fuqarolar yig'inlari raisi saylovini o'tkazish muddatlari saylov boshlanishidan kamida ikki oy oldin Qoraqalpog'iston Respublikasi Jo'qorg'i Kengesi, xalq deputatlari viloyatlar va Toshkent shahar Kengashlari tomonidan belgilanadi.

Yangi tartibdan kelib chiqib, xalq deputatlari viloyat Kengashi Samarqand viloyatidagi fuqarolar yig'inlari raislarining navbatdagi saylovini 2025-yilning may-iyul oylarida o'tkazish to'g'risida qaror qabul qildi.

Qaror bilan fuqarolar yig'inlari raislari saylovini tashkil etish va o'tkazish bo'yicha chora-tadbirlar rejasini, shuningdek, xalq deputatlari viloyat Kengashi raisi boshchiligidagi 25 kishidan iborat fuqarolar yig'inlari raislari saylovini tashkil etish va o'tkazishga ko'maklashuvchi Samarqand viloyati komissiyasi tarkibi tasdiqlandi.

Sessiyada xalq deputatlari viloyat Kengashi huzurida ekspert guruhi tashkil qilish, xalq deputatlari viloyat Kengash deputati tomonidan deputat so'rovini yuborish tartibini tasdiqlash, xalq deputatlari viloyat Kengashi sessiyasida davlat organlari va tashkilotlari mansabdor shaxslarining hisobot (axborot) larini eshitishning tartibini tasdiqlash to'g'risidagi va Kengash faoliyati bilan bog'liq bir qator masalalar ko'rib chiqilib, tasdiqlandi.

Keyingi paytda viloyatdagi ayrim rahbarlar faoliyatida Kengash, deputat so'rovi bilan bog'liq masalalarda e'tiborsizlikka yo'l qo'yilayotgani, so'rovga yuzaki qaralayotgani kuzatilmog'ida, dedi viloyat Kengashi raisi Sh.Negmatov. – Vaholanki, bunday holatlar uchun qonunlarimizda javobgarlik choralarini belgilangan. O'sha darajaga bormaslik uchun rahbarlardan har bir so'rovga belgilangan tartib doirasida va o'z vaqtida javob berishlarini so'rayman. Deputat o'zi uchun emas, uni saylagan saylovchilar manfaatlaridan kelib chiqib, ularning taklif va murojaatlari asosida so'rov yuborayotganini unutmag.

Shuningdek, sessiyada O'zbekiston Respublikasi Oliy Majlisi Senati Kengashining 2025-yil 14-yanvardagi "Hududlarni rivojlantirish hamda aholi muammolarini hal etishda mahalliy Kengashlar deputatlari va senatorlarning "mahalla yetilligi" bilan o'zaro hamkorligini yanada kuchaytirish chora-tadbirlari to'g'risida" 35-V-sonli qarori ijrosini ta'minlash, viloyatda "Zarbdor tajribasi" asosida sanoat, xizmat va qishloq xo'jaligi sohalarda amalga oshiriladigan drayver loyihalar bo'yicha takliflarni ko'rib chiqish va ma'qullash to'g'risidagi va boshqa masalalar muhokama etilib, qarorlar qabul qilindi.

Sport federatsiyalaridagi muammolar:

Natijalar qoniqarsiz, homiylar biriktirilmagan, terma jamoaga sportchilar yetkazib berilmayapti

Yaqinda Prezident raisligida 2028-yilgi Olimpiya va Paralimpiya o'yinlariga tayyorgarlikni kuchaytirish, ommaviy sportni yangi bosqichga olib chiqish masalalariga bag'ishlangan videoselektor yig'ilishida badminton, yadro, disk, nayza uloqtirish, sakrash, yengil atletika, suv sporti, o'q otish va yana bir nechta sport turlari bo'yicha natijalar qoniqarli emasligi tanqid qilingan edi.



XO'SH, SAMARQANDDA-CHI? AHVOL QANDAY?

Sport turlariga e'tibor qaratilyaptimi, sport federatsiyalarining natijalari qoniqarli, homiylar biriktirilmaganmi, sport federatsiyalari terma jamoaga sportchi yetkazib beryaptimi? Bu savollarga viloyatdagi sport federatsiyalari mas'ullaridan javob oldik.

VOLEYBOL SPORT KLUBI NEGA TASHKIL ETILMAYAPTI?

Viloyatda 24 ta olimpiya, 4 ta milliy, 35 ta noolimpiya sport federatsiyasi faoliyat ko'rsatmoqda. Jumladan, voleybol sport turidan 91 nafar murabbiy qo'l ostida 2800 nafar o'g'il-qiz shug'ullanadi. Voleybol federatsiyasi viloyat bo'limi ijrochi direktori G'olib Maxsumovning ta'kidlashicha, O'zbekiston milliy terma jamoasi tarkibiga uch nafar sportchi qabul qilingan bo'lsa, keyingi yillarda terma jamoaga sportchilar yetkazib berilmayapti. Chunki sportchilarning shug'ullanishi uchun baza yo'q, federatsiya uchun bino ajratilmagan, sport jihozlari yetishmaydi.

Qaysidir tashkilot musobaqalarni tashkil etishda yordam so'rasa, faqat musobaqa nizomini tuzib beramiz va hakamlilik qilamiz, - deydi G'.Maxsumov. - Doimiy musobaqalar o'tkazish, safar turnir-



larida qatnashish va yuqori natijalarga erishgan sportchilarni taqdirlashga mablag' yo'q. Biz esa jamoatchilik asosida ishlaymiz, xodimlarga maosh tugul, rag'batlantirish ham berilmaydi. Shunday bo'lsa-da, yoshlarning qiziqishi va ularning sport formasida bo'lishi uchun imkon darajasida sport maktablari trenerlari hamkorligida musobaqalarni o'zimiz tashkil qilamiz.

Prezidentimizning 2024-yil 19-iyundagi "Voleybol sport turlarini yanada rivojlantirish chora-tadbirlari to'g'risida"gi qaroriga ko'ra, Samarqandda iqtidorli sportchilarni saralash tizimini yaxshilash, voleybol sport turi bo'yicha zamonaviy sport infratuzilmasini yaratish hamda milliy terma jamoalarimizning nufuzli sport musobaqalarida yuqori natijalarga erishishini ta'minlash maqsadida voleybol sport klubi tashkil etilishi kerak edi, - deydi voleybol bo'yicha viloyat terma jamoasi bosh murabbiyi Jo'rabek Nabiyev. – Biz qaror asosida ushbu klub faoliyatini yo'lga qo'yish maqsadida viloyat sport boshqarmasiga loyiha tayyorlab berdik. Loyiha viloyat hokimligiga taqdim etilgan aytiladi. Biroq oradan bir yil vaqt o'tgan bo'lsa-da, masala suvga cho'kkan tosh kabi jimib ketdi.

(Davomi 3-sahifada) >>>

"QIZIL"

Obod va xavfsiz mahalla

"YASHIL"

ga

AYLANISHI UCHUN...

Yoxud osoyishtalik faqat inspektorga kerakmi?

– Meni uyga kiritib qo'yishingiz kerak. Toyloq tumani ichki ishlar bo'limi huquqbuzarliklar profilaktikasi bo'limi boshlig'i Jahongir Nazarov qabuliga kirgan ayol birato'la maqsadga o'tdi. Uning aytishicha, oilasidagi notinchiliklarga qaynonasi sababchi, o'zi beayb ekan. Qizig'i, u yaqinda qaynonasiga tan jarohati yetkazganligi uchun jinoiy javobgarlikka tortilgan. Jazoni ijro etib bo'lgach, sud qarori asosida qaynonasining uyiga qayta kirib, "himoya orderi" ham olmoqchi. Savollarimizga javob berarkan, orada "7 yildan beri shu ish"ning ichida yuribman, ko'zlarim pishib ketgan", deya miyig'ida kulib qo'yadi.



Unga ko'ra, erining uyidagi barcha qarindoshlari unga dushman, eri ham nikoh asosida boshqa ayol bilan yashashni boshlagan. Shunday bo'lsa-da, u o'sha uyga kirmoqchi. Suhbat davomida angladikki, u buni oilasini tiklab, tinch-totuv yashash uchun emas, balki tugallanmay qolgan "ish"ni tugatish va qasos olish uchun qilyapti. Albatta, profilaktika inspektori kunu tun uni eridan, erini esa undan qo'riqlab yura olmaydi. Agar hozir qonun ustuvorligi ta'minlanib, ayol uyga majburan kiritib qo'yilsa, ertaga yangi jinoyat sodir bo'lmaguncha kafolat yo'q. Bu paradoks, shundaymi?

(Davomi 2-sahifada) >>>



"QIZIL"

"YASHIL" ga

AYLANISHI UCHUN...

Yoxud osoyishtalik faqat inspektorga kerakmi?

(Davomi. Boshlanishi 1-sahifada).

Keyingi yillarda mamlakatimizda jinoyatchilikning oldini olish, huquqbuzarlik sodir etilishiga sabab bo'layotgan ijtimoiy-maishiy muammolarni profilaktika qilish hamda aholida shaxsiy xavfsizlik hissini shakllantirish masalalariga e'tibor ortdi. "Xavfsiz shahar", "Obod va xavfsiz mahalla" singari qator loyihalar ishlab chiqilib, mahallalar "qizil", "sariq" va "yashil" toifalarga ajratildi. Biroq tahlil va kuzatuvlar barcha sa'y-harakatlarga qaramay, joylarda huquqbuzarliklarning ma'lum turi (asosan og'ir jinoyatlar) kamaysa-da, boshqalari ko'payganligini ko'rsatmoqda. Xo'sh, buning sababi nima? Va muammo qanday hal qilinadi? Toyloq tumani misolida vaziyatni o'rganishga harakat qildik.

"YASHIL"DAN "QIZIL"GACHA BIR QADAM

Tumanda 50 ta mahalla bo'lib, ayni kunda shundan 11 tasi "qizil" toifaga kiritilgan. Bu har beshta mahalladan birida kriminogen vaziyat yomon, degani. Jumladan, Charog'bon mahallasi o'tgan yilning yakunigacha "yashil" toifada edi. Biroq ketma-ket sodir etilgan bir nechta og'ir jinoyat uning "yuz"ini ham "qizil" qildi.

— Mahallamiz markazda joylashganligi uchun doimo odamlar bilan javjum, — deydi mahalla raisi Matluba Amirova. — Hududda qator ijtimoiy obyektlar, bozor, 365 ta tadbirkorlik subyekti, 21 ta ko'p qavatli uy bor. Shu bois huquqbuzarliklar profilaktikasida murakkabliklarga duch kelyapmiz. To'g'ri, tegishli dasturlar ijrosi bo'yicha barcha ishlar amalga oshirildi. Xususan, ko'chalarimizda tungi yoritish chiroqlari o'rnatilgan, 8 ta ko'cha kameralashtirilib, ichki ishlar bo'linmasiga ulangan. Ko'chaboshlari tayinlangan. Biroq bu yetarli bo'lmayapti. Aholimiz ko'p, kelib-ketuvchilar ham. Birgina profilaktika inspektorining o'zi ularni nazorat qila olmaydi.

Mahalla profilaktika inspektori Dilshod Murodullayev ushbu lavozimga tayinlanganiga hali ko'p bo'lmagan. U hudud va undagi kriminogen vaziyatga ta'sir qiluvchi omillarni o'rganayotganligi, vaziyatni to'liq bilmay olingan biror xulosa bildira olmasligini ma'lum qildi. Bu to'g'ri qaror. Noprofessional xodim bo'lganida edi, "Ayb menda emas, odamlarning o'zi sababchi", deya muammoni o'zidan soqit qilishga urinardi. Inspektorlarga e'tirozimiz yo'q. U mahallada hali "begona". Muammoning ildizini topishi, qolaversa, odamlarning ishonchiga kirishi uchun vaqt kerak.

"YO'L XARITASI" NATIJA BERADIMI?

Yaqinda shu mahallada Ichki ishlar vaziri Po'lat Bobojonov ham bo'lib, tuman sektor rahbarlari bilan hududda jinoyatchilik va huquqbuzarliklarning oldini olish bo'yicha amalga oshirilayotgan ishlar va "mahalla yettilligi" faoliyati bilan tanishdi. Jarayonda mahallada huquqbuzarliklar profilaktikasini tashkil etish maqsadida tuzilgan "Yo'l xaritasi" muhokama qilinib, uning ijrosiga bo'yicha qator tavsiya va topshiriqlar berildi.

Bu tartib birgina Charog'bonga taalluqli emas. Endi barcha mahallalarda kriminogen vaziyatni barqarorlashtirish hamda huquqbuzarliklarning barvaqt oldini olish tizimining samaradorligini oshirish bo'yicha manzilli chora-tadbirlar — "yo'l xaritasi" ishlab chiqilmoqda. Prezidentning 2025-yil 3-yanvardagi "2025-yilda respublika mahallalarida xavfsiz muhitni yaratish va huquqbuzarliklarning barvaqt oldini olish tizimi samaradorligini yanada oshirish bo'yicha chora-tadbirlar to'g'risida"gi qarori bunga asos.

Bundan tashqari, hujjatga muvofiq, barcha viloyatlarda kriminogen vaziyatni barqarorlashtirish hamda yangicha yondashuvlar asosida huquqbuzarliklarning barvaqt oldini olish tizimi yaratilishi belgilangan. Uning doirasida joylarda "Xavfsiz va raqamli mahalla", "Namunal xavfsiz ko'cha", "Xavfsiz bozor", "Xavfsiz bekat", "Huquq-tartibot maskani", "Xotin-qizlar orasida

jinoyatchilikning barvaqt oldini olish" bo'yicha namunal tizimlar yo'lga qo'yiladi. Ichki ishlar vazirligi tomonidan profilaktika kichik inspektori, migratsion profilaktika bo'linmalari, ma'muriy amaliyot guruhlari va profilaktika bosh inspektori lavozimlari joriy qilinadi.

— Tumanimizda tegishli qaror ijrosi bo'yicha ishlar allaqachon boshlangan, — deydi Toyloq tumani ichki ishlar bo'limi huquqbuzarliklar profilaktikasi bo'limi boshlig'i Jahongir Nazarov. — Xususan, mahallalarimizni 16 hududga bo'lgan holda profilaktik nazorat tadbirlarini o'tkazaymiz. Kechki vaqtda ham navbatchi xodimlar ko'chama-ko'cha yurib, fuqarolarning halovatini ta'minlaydi. Aytmoqchi bo'lganim, xodimlarimiz doimo xalq orasida va xizmatga



shay. Biroq hali ham ba'zi hollarda fuqarolar huquqbuzarliklarni yashirishga yoki u sodir bo'linganidan keyingina xabar berishga moyil. Agar teskarisi bo'lganida, huquqbuzarlik profilaktikasida jamoatchilik ham faol bo'lganida, maqsadimizga tezroq erishgan bo'lar edik.

"YASHIL" MAHALLA FAQAT INSPEKTORGA KERAKMI?

Mavzuni o'rganish, fuqaro va mas'ullar bilan suhbatlashish davomida ba'zi xulosalarga keldik. Aytaylik, biz borgan aksar "qizil" toifadagi mahallalarda huquqbuzarliklar ko'p sodir etilishiga sabab qilib asosan mahallaning markazida yoki serqatnov yo'l yoqasida joylashganligi ko'rsatilmog'da. Go'yo ulardagi barcha jinoyatni begonalar qilgan. Lekin mahallalarni toifaga ajratish vaqtda bu inobatga olinadi-ku, ya'ni oldini olish mumkin bo'lgan huquqbuzarliklar soniga qarab xulosa qilinadi, adashmasak. Avariya, joy va makon tanlamaydigan firibgarlik yo korruptsiya harakatlar singari holatlar inobatga olinmaydi.

Ikkinchidan, nega hududda huquqbuzarlik sodir etilsa, bosh aybdor sifatida profilaktika inspektori ko'rila-di? To'g'ri, joylarda kriminogen vaziyat barqarorligini ta'minlashga qaratilgan qaror va boshqa hujjatlarda jarayonga mas'ul bo'lganlar ro'yxati uzun bo'ladi. Lekin kuzatuvlarimiz bu vazifalar amalda faqat nozir zimmasida qoldirilayotgani, hatto mahalla raisi ham muammoning asl mohiyatini anglamayotganini ko'rsatmoqda.

Vaziyatni aniqroq tushuntirish uchun misol keltiramiz. Aytaylik, spirtli ichimliklarga ruju qo'ygani er xotini bilan kelishmochilik vaqtda unga og'ir tan jarohati yetkazdi. Bu holatda yarashtirish haqida gap ketmaydi, darhol jinoyat ishi ochiladi. Xo'sh, jinoyatda inspektor aybdormi? Ko'pchilik, ha aybdor, deydi. Boisi u notinch oila bilan profilaktik tadbir o'tkazishi, lozim bo'lsa, erni davolatisi, qayta tarbiyalashi, ayolni himoya qilishi kerak ekan. To'xtang, unda mahalla raisi, xotin-qizlar faoli, ijtimoiy xodim nima qiladi? Inspektor mahalladan tayinlanmaydi, ya'ni u xizmat joyidagi fuqarolarga begona. Hech kim unga dardini aytmaydi, uyiga kirmoqchi bo'lsa, hujjat so'raladi. Rais yo boshqa faollardan kimdir hujjat so'raydimi? Albatta, yo'q. Holbuki, ular o'sha erkakning nega ichkilikka berilganligi (to'g'ri yo'lga qaytarilmagan), ishsizlikdan qiyalayotganligi (yordam berilmagan), xotinining tili yomonligini ham bilishadi (janjalning oldi olinmagan). Bu gap o'sha oilaning qo'shnilar, yaqinlari, qarindoshlariga ham taalluqli.

Xulosa qilib aytganda, jinoyat bir soniyada sodir bo'ladi. Ammo u yillar davomida "pishib" keladi. Endi tasavvur qiling, bitta mahallada shunga o'xshash 10 ta oila bor (amalda bundan ko'p bo'ladi). Ularga vaqtda, kerakli odamlar tomonidan berilmagan yordam hozir qilinsa, notinch oila bir zumda namunuliga aylanib qoladimi? Yo'q. Uni sog'lomlashtirish uchun ham yillar kerak. Ba'zan bu imkonsiz ham. Maqola boshida tilga olingan "qasoskor" kelin vaziyatidek.

Muammo yechimsiz emas. Faqat u bir yo'li ikki kishi bilan yechilmaydi. Befarqlik ortarkan, jinoyatchilik kamaymaydi.

Asqar BAROTOV,
"Zarafshon" muxbiri.



Yoshlarning bandligini ta'minlash, kasb-hunar va tadbirkorlikka o'qitish, umuman, qiziqishiga qarab sohalarga yo'naltirish yoshlar hayotida muhim o'rin tutadi. Bu jarayonda mahalladagi yoshlar yetakchilari yigit-qizlarni qo'llab-quvvatlab, o'z salohiyati va iste'dodini namoyish etishi uchun ko'prik bo'lishi kerak.

Urgut tumanidagi O'zbekiston mahallasi yoshlar yetakchisi Diyorbek Akbarov ayni vazifani sidqidildan bajarmoqda. Shuningdek, u yosh maslahatchilar kengashi raisi o'rinbosari, Oliy Majlis Senati huzuridagi Yoshlar parlamenti a'zosi sifatida yoshlar muammolarini hal etish, ularni qo'llab-quvvatlash borasida jonbozlik ko'rsatib kelmoqda.

Diyorbek 2024-yilda "Yilning eng namunali mahalla yoshlar yetakchisi" ko'rik-tanloving "Yoshlarning tadbirkorlik g'oyalarini amalga oshirishda va bandligini ta'minlashda samarali ko'maklashgan eng namunali mahalla yetakchisi" yo'nalishida g'olib bo'lgan.

YOSHLARGA «KO'PRIK» BO'LAYOTGAN YETAKCHI

Bir yilda yoshlar bandligini ta'minlashda katta o'sish

42 NAFAR BITIRUVCHI ISHLI BO'LDI

— O'tgan yil faoliyatimni boshlaganman, — deydi Diyorbek Akbarov. — Mahallamiz drayveri xizmat ko'rsatish va dehqonchilikka ixtisoslashgan, hududda 6865 nafar aholi yashaydi, ularning 1932 nafarini yoshlar tashkil etadi. Mahallaga kelib, ishsiz yoshlar ro'yxatini shakllantirdim va qiziqishi, imkoniyati, oilaviy holatini tahlil qildim. Natijada yoshlarning 1253 nafari "yashil", 676 nafari "sariq", 12 nafari "qizil" toifaga ajratildi. Dastlab yoshlarga kasb-hunar o'rgatish, qisqa muddatli kurslarga yo'naltirish, malaka oshirish dasturlarini tashkil etish va ular uchun ish o'rinlarini yaratish maqsadida mahalladagi tadbirkor, hunarmand va fermerlar bilan hamkorlik yo'lga qo'yilib, ularga 42 nafar maktab va kasb-hunar maktabi bitiruvchilari birkirildi. Natijada o'quv yili oxirida birkirilgan yoshlarning bandligi ta'minlanib, doimiy daromad manbaiga ega bo'lishiga erishildi.

Diyorbekning aytishicha, ayni paytda yana 65 nafar yosh turli sohalar bo'yicha tadbirkorlarga birkirilgan va ular o'qish bilan bir vaqtda doimiy daromad topib, tadbirkorlik faoliyatini ham o'rganmoqda. Jumladan, shu mahallada yashovchi Jahongir Ravshanov, Muhammadali Hasanov va Akobir Bo'ronov tumandagi yetakchi tadbirkorlardan ish o'rganib, hozirda «Urgut» savdo kompleksida savdo do'konlari tashkil qilishgan va ikkitadan ish o'rni yaratgan.

10 TA TADBIRKORLIK SUBYEKTI TASHKIL ETILDI

— Mahallada yosh tadbirkorlarni qo'llab-quvvatlash maqsadida hokim yordamchisi bilan hamkorlikda 2024-yilda 45 nafar yoshga kredit olib berildi, — deydi Diyorbek. — Shundan 16 nafari «Biznesga birinchi qadam» dasturi orqali 80 million so'm, 3 nafari «Kichik va o'rta biznesni rivojlantirish» dasturi orqali 260 million so'm, 26 nafari esa «Oilaviy tadbirkorlikni rivojlantirish» dasturi orqali 295 million so'm kredit ajratildi. Natijada 10 ta yangi tadbirkorlik subyekti tashkil etilib, 2 tasi faoliyatga qayta tiklandi.

"BANDLIK DASTURI" AMALDA

O'tgan yil "Bandlik dasturi" ga mahalladagi 140 nafar yosh kiritilgan bo'lib, shundan 50 nafari ishsiz, 90 nafari bitiruvchi edi. Dasturga kiritilgan 47 nafar yosh Vazirlar Mahkamasida huzuridagi Biznes va tadbirkorlik oliy maktabi Samarqand viloyati filialida o'qishga yo'naltirilgan, 25 nafar yosh savdo-sanoat palatasi yordamida tadbirkorlikka oid o'quv dasturlarini tamomlagan va 20 nafardan ziyod maktab bitiruvchisi doimiy ish o'rinlariga joylashtirilgan. Shuningdek, dastur doirasida to'rt nafar bitiruvchiga o'zini o'zi band qilishi uchun zarur yordam ko'rsatilgan, 10 nafar ishsiz yoshga kredit ajratilgan, 40 nafar yoshning bandligi ta'minlangan.



10 NAFAR YOSH XALQARO TIL BILISH SERTIFIKATINI QO'LGA KIRITGAN

O'zbekiston mahallasi yoshlari o'tgan yil davomida "Ibrat academy" ilovasi orqali xorijiy tillarni o'rganish jarayonida katta muvaffaqiyatga erishdi. Jumladan, 10 nafar yosh xorijiy tilni o'rganib, xalqaro sertifikatlarini qo'lga kiritgan. Yoshlar yetakchisining tashabbusi bilan xorijiy til sertifikatlarini olgan yoshlardan iborat "Ibrat farzandlari" jamoasi tuzilgan. Ushbu jamoaning asosiy vazifasi mahalladagi yoshlar o'rtasida xorijiy tillarni o'rganishni targ'ib qilish va til o'rganishga qiziqqan yoshlarni qo'llab-quvvatlashdir.

Ayni paytda jamoada faoliyat ko'rsatayotgan 11-sinf o'quvchilari Islombek Jamolov va Umiddjon G'ulomov mahalladagi ijtimoiy himoyaga muhtoj, iqtidorli va til o'rganishga qiziqqan 48 nafar yoshga ingliz tilini bepul o'rgatmoqda. Shuningdek, 10-sinf o'quvchisi Xislatbek Umarov o'quv kursini tashkil qilib, ta'lim olish bilan birga, daromad manbaiga ham ega bo'lmoqda.

«MAQSADIMIZ — SHOHSUPAGA KO'TARILISH, YOSHLAR BANDLIGINI TA'MINLASH VA XORIJYI TILLARNI O'RGANISH»

Diyorbek Akbarov 2025-yil uchun o'zining aniq va maqsadli rejalarni ishlab chiqib, muhim tashabbuslarni amalga oshirishni maqsad qilgan.

— Joriy yil yoshlar bandligini ta'minlashni va ularning hayotini yaxshilashga yo'naltirilgan yangi loyihalarni amalga oshirishni rejalashtirganman, — deydi Diyorbek. — Jumladan, "Besh tashabbus olimpiadasi" doirasida tanlov va musobaqalarning respublika bosqichida kamida 5 ta yo'nalish bo'yicha yuqori o'rinlarni egallash asosiy maqsadlarimizdan biri. Shu bilan birga, maktab va oliy ta'lim muassasalarini bitirayotgan 115 nafar yoshning bandligini ta'minlash, "Ibrat academy" ilovasi orqali xorijiy tillarni o'rganish va "Ustoz Al" ilovasi orqali mahallada zamonaviy kasblarni bepul o'rganish tizimini ommalashtirish ko'zda tutilgan. Bundan tashqari, migratsiyaga ketgan 178 nafar yosh bilan tizimli ishlash va yil oxirigacha 80 nafardan ziyod yoshni yurtga qaytarib, ish bilan ta'minlash belgilangan.



Fazliddin RO'ZIBOYEV,
"Zarafshon" muxbiri.

Samarqandda tayyorlangan mahsulotlar dunyoning 65 davlatiga sotildi

O'zbekistonda ishlab chiqarilgan mahsulotlar dunyoning 80 dan ortiq davlatiga eksport qilinmoqda. Jumladan, viloyatimizdan eksport qilingan mahsulotlar 2024-yilda 65 davlatga sotildi. O'tgan yilning o'zida 13 ta yangi bozor o'zlashtirildi.

Raqamlarga qaraydigan bo'lsak, 2024-yilda viloyatimizdan 716,2 million dollarlik (499,5 million dollar sanoat mahsulotlari va 216,7 million dollar qishloq xo'jaligi) mahsulotlar eksportga chiqarilib, o'tgan yilning mos davriga nisbatan 127 foizga yoki 153,8 million dollarga ko'p eksport qilindi. Yil davomida 589 ta korxonada mahsulotlarni tayyorlash maqsadida ushbu davlatning boj-xona maxsus xizmati ro'yxatiga 22 ta eksportchi korxonalar kiritilishida amaliy yordam ko'rsatilib, ular tomonidan bugungi kungacha qadar 11,8 million dollarlik mahsulot eksporti amalga oshirishiga erishildi.

2025-yilda viloyatimizda sanoat va qishloq xo'jaligi mahsulotlari

180 ta korxonaga jalb qilinib, ular tomonidan 67,1 million dollarlik mahsulotlar Xitoy, Turkiya, Qozog'iston, AQSH, Rossiya va boshqa davlatlarga eksport qilindi. 15 ga yaqin yangi turdagi mahsulotlar eksportga chiqarilib, ularning hajmi qariyb 30,1 million dollarni tashkil etdi.

Xitoy Xalq Respublikasiga eksport hajmlarini yanada oshirish maqsadida ushbu davlatning boj-xona maxsus xizmati ro'yxatiga 22 ta eksportchi korxonalar kiritilishida amaliy yordam ko'rsatilib, ular tomonidan bugungi kungacha qadar 11,8 million dollarlik mahsulot eksporti amalga oshirishiga erishildi.

2025-yilda viloyatimizda sanoat va qishloq xo'jaligi mahsulotlari

eksport hajmini 850 million dollarga yetkazish rejalashtirilgan. Buning uchun 100 dan ortiq yangi korxonalar eksport faoliyatiga jalb qilinib, 10 tadan ortiq yangi turdagi mahsulotlar eksporti yo'lga qo'yiladi. Jumladan, qisqichbaqa, konditsioner, santexnika fittinglari, sanoatda foydalaniladigan tuz mahsulotlari, mis kabellari, konservalangan tayyor taomlar hamda o'simliklarni kimyoviy himoyalash vositalari eksportga chiqarilib, ularning hajmi 20 million dollarga yetkaziladi.

Yusuf NORIMOV,
viloyat investitsiyalar, sanoat va savdo boshqarmasi boshlig'i o'rinbosari.



Sport federatsiyalaridagi muammolar:

Natijalar qoniqarsiz, homiylar biriktirilmagan, terma jamoaga sportchilar yetkazib berilmayapti

(Davomi. Boshlanishi 1-sahifada).

BADMINTON OLIMPIYA SPORTI TURI, AMMO...

Badminton olimpiya sport turiga kiradi. Federatsiyaning viloyat bo'limi 2014-yilda tashkil etilgan bo'lib, shug'ullanish uchun baza ajratilgan.

- Hozirgi kunda 25 nafar trener o'qituvchi qo'l ostida 1300 nafardan ziyod yoshlar badminton bilan shug'ullanib kelmoqda, - deydi badminton federatsiyasi viloyat bo'limi ijrochi direktori Marat Muhammadiyev.

- Federatsiya tomonidan respublika terma jamoasiga bor-yo'g'i 2 nafar sportchi yetkazib berilgan. Chunki aksariyat hududlarda kadrlar, sport jihozlari yetishmaydi. Homiylar biriktirilmagan va mablag' yo'qligi uchun musobaqalar ham deyarli tashkil etilmaydi. Viloyatda badminton sport turini rivojlantirish borasida tadqiqot ham olib boryapman. Jumladan, yaqinda badminton bilan shug'ullanuvchilar uchun "Badminton" mobil ilovasi va "Badminton academy" onlayn platformasini yaratdim. Ushbu platformalar orqali innovatsion usulda ushbu sport turini o'rganish mumkin. Biroq mashg'ulotlarni amalga bajarish talab etiladi va buning uchun qulay sharoit bo'lishi kerak.

SPORT MAKTABLARIDA REGBI YO'NALISHI NEGA YO'Q?

Regbi federatsiyasining viloyat bo'limi 2017-yilda tashkil etilgan. Biroq 2020-yilda faoliyat boshlagan. Ayni paytda 10 nafar trener qo'l ostida 200 nafarga yaqin yoshlar shug'ullanadi. Viloyatda mazkur sport turiga ixtisoslashgan maxsus baza yo'q, homiylar yo'q. Shu sababli mashg'ulotlar Toyoq tumanidagi sport maktabida olib boriladi.

Regbi sport turi bo'yicha viloyat terma jamoasi bosh treneri Zafar Berdiqulovning ma'lum qilishicha, sakkiz yillik faoliyat davomida regbi bo'yicha milliy terma jamoaning asosiy va zaxira tarkibiga 12 nafar sportchi qabul qilingan, xolos. Ush-

bu olimpiya sport turining rivojlanmayotganiga asosiy sabab viloyatdagi aksariyat sport maktablarida regbi sport turi yo'nalishi yo'q va trenerlarga shtat ajratilmagan.

Federatsiyalar reytingiga ko'ra, dzyudo, eshkak eshish, yunon-rum kurashi, yengil atletika, gimnastika, kurash va sambo sport federatsiyalari yaxshi natija ko'rsatayotgan bo'lsa, 20 ga yaqin sport turi - basketbol, suzish, gandbol, penchak silat, erkin kurash, qilichbozlik, ot sporti, voleybol, sportning texnik va o'q otish, tennis federatsiyalari qoniqarsiz natija qayd etmoqda. Misol uchun, o'q otish federatsiyasining viloyat bo'limi bir yildan beri faoliyat ko'rsatmayotgan bo'lsa, keyingi yillarda kikkoksing, shotakan karate, o'zbek jang san'ati federatsiyalari O'zbekiston milliy terma jamoalari tarkibiga sportchi yetkazib bermayapti.

Sport federatsiyalaridagi ushbu muammolar yechimi, ularning monitoringi bo'yicha ma'lumot olish uchun viloyat sport boshqarmasiga murojaat qildik. Afsuski, "Federatsiyalar alohida tashkilot, bizga qaramaydi, ularni nazorat qiluvchi tashkilot biriktirilmagan" degan javobdan boshqa hech narsa ololmadik.

Aytish joizki, sport federatsiyalariga viloyatdagi sektor rahbarlari, mutasaddi tashkilot mas'ullari va sportchi-trenerlar biriktirilgan. Ammo ular jamoatchilik asosida ishlaydi. Shuning uchun musobaqalar o'tkazish, shug'ullanish uchun bazalar yo'qligi, sportchilarni rag'batlantirish, sport anjomlari va kadrlar bilan bog'liq muammolar yuzaga kelmoqda. Shuningdek, federatsiyalarning faoliyatini monitoring qiladigan tashkilot yo'q. To'g'ri, federatsiyalar nodavlat tashkilot, lekin ularga imtiyozlar berilmagan, qo'shimcha boshlar, rag'batlantirish nazarda tutuvchi me'yorlar ham belgilanmagan. Xullas, ushbu muammolarni aytgan bilan amalga hal qilinmasa, muammoligicha qolaveradi.

Fazliddin RO'ZIBOYEV.



O'zbekiston Respublikasi Oliy Majlisining Inson huquqlari bo'yicha vakil (ombudsman) instituti Mustaqil davlatlar hamdo'stligi mamlakatlari orasida birinchilardan bo'lib, 1995-yil 23-fevralda tashkil etilgan.

Mazkur institut Oliy Majlisning siyosiy qo'llab-quvvatloviga tayanadi va fuqarolar huquqlarining davlat organlari hamda ularning mansabdor shaxslari tomonidan o'z vakolatlarini suiiste'mol qilishdan himoya qiluvchi demokratik institut sifatida namoyon bo'ladi.

O'ttiz yillik davr mobaynida Vakillik institutining vakolatlari, uning ish uslublari, fuqarolar huquq va erkinliklarini himoya qilish milliy tizimidagi o'rni va roli takomillashib bordi.

Oxirgi yillarda O'zbekistonda davlat va jamiyat qurilishining barcha sohalarda tub islohotlarning amalga oshirilishi Vakillik institutiga katta mas'uliyat yukladi. O'z navbatida institutning faoliyat yo'nalishlari ham takomillashib bormoqda.

Jumladan, 2017-2021-yillarda O'zbekiston Respublikasini rivojlantirishning beshta ustuvor yo'nalishi bo'yicha Harakatlar strategiyasi

OMBUDSMAN — INSON HUQUQLARI HIMOYASIDA

Ombudsman institutini rivojlantirishning muhim bosqichi bo'ldi.

2019-yil 14-martda "O'zbekiston Respublikasi Oliy Majlisining Inson huquqlari bo'yicha vakil (ombudsman) to'g'risida"gi Qonunga o'zgartirish va qo'shimchalar kiritilib, Vakillik institutining vakolatlari, xususan, jazoni ijro etish muassasalarida saqlanayotgan shaxslarning huquqlarini himoya qilish bo'yicha vakolatlari yanada kengaytirildi. Shuningdek, qiyonoqlar va boshqa shafqatsiz, g'ayriinsoniy yoki qadr-qimmatni kamsituvchi muomala va jazo turlarining oldini olishga qaratilgan chora-tadbirlar tizimi joriy etildi.

Qonunga ko'ra, Vakillik O'zbekiston Respublikasi Konstitutsiyaviy sudiga ko'rib chiqishi uchun masalalar kiritish huquqi berildi. Fuqarolarning manfaatlarini ko'zlab, davlat boji to'lamagan holda ariza va da'volar bilan sudlarga murojaat qilish, davlat organlari va boshqa tashkilotlar rahbarlariga inson huquqlari, erkinliklari sohasidagi qonun hujjatlarining aniqlangan buzilishlarini, ularga imkon beruvchi sabablar va shart-sharoitlarni hamda qonunchilik tashabbusi huquqini bartaraf etish yuzasidan takliflar kiritish huquqi ta'minlandi.

Prezidentimizning 2021-yil 26-iyundagi "Qiyonoqlar holatlarini aniqlash va ularning oldini olish tizimini takomillashtirishga doir qo'shimcha chora-tadbirlar to'g'risida"gi farmonida Vakillik qiyonoqlarning barvaqt oldini olishning samarali huquqiy mexanizmlarini yaratish bo'yicha ustuvor vazifalar belgilandi. Murojaatlarni tezkor va xolisona ko'rib chiqish, harakatlanish erkinligi cheklangan shaxslar saqlanadigan joylarga muntazam monitoring tashriflarini amalga oshirish vazifalari qo'yildi.

Davlatimiz rahbarining 2021-yil 10-sentyabr-dagi "O'zbekiston Respublikasi Oliy Majlisining Inson huquqlari bo'yicha vakili faoliyatini takomillashtirish chora-tadbirlari to'g'risida"gi qaroriga muvofiq, 2022-yildan buyon Vakillik viloyatlarda mintaqaviy vakillari doimiy asosda faoliyat yuritib kelmoqda.

Yangi tahrirdagi Konstitutsiyaning 98-moddasiga muvofiq, Ombudsman qonunchilik tashabbusi bilan O'zbekiston Respublikasi Oliy Majlisining Qonunchilik palatasiga qonunchilik takliflari kiritish huquqiga ega bo'ldi.

2024-yil 15-noyabrda "O'zbekiston Respublikasi Oliy Majlisining Inson huquqlari bo'yicha vakili (ombudsman) to'g'risida"gi yangi Qonun qabul qilindi. Qonun bilan Ombudsmaning vakolatlari kengaytirilib, vazifalari belgilandi.

Ushbu qonunga ko'ra, Ombudsman O'zbekiston Respublikasi Prezidenti, Oliy Majlis palatalari va Vazirlar Mahkamasiga fuqarolarning huquqlari, erkinliklari va qonuniy manfaatlarini himoya qilishga qaratilgan huquqiy, tashkiliy, ijtimoiy-iqtisodiy va boshqa chora-tadbirlarni o'z ichiga olgan maxsus ma'ruzalar taqdim etish huquqiga ega. Jazoni ijro etish muassasalarida saqlanayotgan mahkumlar endi Ombudsmaning yuzasidan ogohlantirish, taqdimnoma, ittimosnoma va talabnoma kiritishi belgilab qo'yildi.

Obtabek TOSHNIYOZOV,
Oliy Majlisning inson huquqlari bo'yicha vakili (ombudsman)ning Samarqand viloyatidagi mintaqaviy vakili.

Ilmiy davralarga zavq bag'ishlardi

Shunday kishilar borki, ular insonning eng yuksak fazilati — fidokorona mehnatni chinakam hayot mazmuniga aylantirish orqali hurmat qozonib, obro'-e'tibor topadi. Samarqand davlat chet tillar instituti professori, filologiya fanlari doktori Berdiqu Tursunov shunday insonlar sirasidan edi. Agar u kishi hayot bo'lganlarida bugun 85 yoshni qarshilagan bo'lardi.

B.Tursunov 1940-yil 25-fevral kuni Past Darg'om tumanidagi Zangiboyi qishlog'ida tug'ildi. O'rta maktabni bitirib, Samarqand davlat universitetining chet tillar fakultetiga o'qishga kirdi. O'qish davrida o'zining tirishqoqligi va tashkilotchiligi bilan boshqa talabalarga o'rnak bo'ldi. Diplomni olgach, uni ustozlari namoi tili o'qituvchisi sifatida ishda qoldirishdi. Aspiranturada nomzodlik dissertatsiyasi ustida ilmiy tadqiqot olib bordi. 1975-yilda professor Y.Avaliani rahbarligida Leningradga "Hozirgi nemis va o'zbek tillarida ilovali ergashgan

qo'shma gaplar" mavzuida nomzodlik ishini yoqladi.

Domla 1974-yildan katta o'qituvchi, dotsent lavozimlarida ishladi, bir muddat kafedraning boshqaruvchisi, keyinchalik nemis filologiyasi fakulteti talabalariga "Nemis tili tarixi", "German filologiyasiga kirish", "Nazariy grammatika", "Hozirgi zamon nemis tilida ilova hodisasi" va "Tilshunoslikka kirish" fanlaridan saboq berdi.

Ustoz nemis tilidagi "Ilova hodisasi" muammosini ilmiy o'rganishni davom ettirib, 1993-yilda Sankt-Peterburg universiteti ilmiy



kengashida doktorlik ishini himoya qildi. O'zining ma'ruzalari bilan professor o'qituvchilarning konferensiyalarida, xalqaro va respublika miqyosidagi ilmiy-nazariy anjumanlarda faol ishtirok etardi. U 200 ga yaqin ilmiy, ilmiy-uslubiy maqolalar, o'quv qo'llanmalar muallifi.

Xotira uyg'onsa go'zal



Professor qator yillar SamDUda tashkil etilgan filologiya markazi boshlig'ining o'rinbosari, Sam-DChTI nemis filologiyasi fakultetining dekani o'rinbosari, kafedra mudiri, ma'rifati va ma'naviyati ishlari bo'yicha prorektor lavozimlarida faoliyat ko'rsatdi.

Domla turmush o'rtog'i, dotsent Sayyora Obloqulova bilan ikki o'g'il va ikki qizni voyaga yetkazdi. Nabirasi Amira Ibadova ularning izidan borib, filologiya fanlari bo'yicha falsafa doktori bo'ldi.

Berdiqu Tursunov shogirdlariga nisbatan qattiqqo'l va talabchan bo'lsa-da, dilkash inson edi. Shu bois, uning xotirasi institut professor-o'qituvchilari va shogirdlari o'rtasida samimiyat va ehtirom bilan yodga olinadi.

Muxtor BEGMATOV,
filologiya fanlari nomzodi, professor.

REKLAMA, E'OLONLAR, BILDIRISHLAR / Gazetamiz haftada uch marta - seshanba, payshanba va shanba kunlari chop etiladi / Gazetada chop etilayotgan reklama va e'lonlar tezkor, samarali va hamyonbop / MUHOJAAT UCHUN TELEFON: 66-233-91-56

DA'VOLAR BO'LSA...

Jomboy tumanida xususiy amaliyot bilan shug'ullanuvchi notarius Mamatqulov Otobek Bolbekovich notarial idorasida marhum Tursunova Sharapat Muxtarovnaga (2021-yil 23-martda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Mamatqulov Otobek Bolbekovich notarial idorasiga murojaat etishlarini so'raymiz.

Manzil: Jomboy tumani Saroy ko'chasi, 15-uy.

Samarqand shahrida xususiy amaliyot bilan shug'ullanuvchi notarius Norqulov Kamoljon Toshboltayevich notarial idorasida marhum Muxsinov Abduxalil Xamidovichga (2022-yil 25-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Norqulov Kamoljon Toshboltayevich notarial idorasiga murojaat etishlarini so'raymiz.

Manzil: Samarqand shahri Rudakiy ko'chasi, 126-uy, 4-xona.

Payariq tumanida xususiy amaliyot bilan shug'ullanuvchi notarius Ortiqboyev Aziz Azamatovich notarial idorasida marhum Atamuratov Pulat Javidovichga (2023-yil 29-dekabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Ortiqboyev Aziz Azamatovich notarial idorasiga murojaat etishlarini so'raymiz.

Manzil: Payariq tumani Chelak shaharchasi, Istiqol ko'chasi, 73-uy.

Samarqand shahrida xususiy amaliyot bilan shug'ullanuvchi notarius Jo'rayev Kamoliddin Muhiddinovich notarial idorasida marhum Nazarov Shirmamedga (2006-yil 13-iyunda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Jo'rayev Kamoliddin Muhiddinovich notarial idorasiga murojaat etishlarini so'raymiz.

Manzil: Samarqand shahri O'zbekiston ko'chasi, 35-uy.

Samarqand shahrida xususiy amaliyot bilan shug'ullanuvchi notarius Yusupova Iroda Rustamovna notarial idorasida marhum Tursunov Istam Ishankulovichga (2021-yil 1-sentabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Yusupova Iroda Rustamovna notarial idorasiga murojaat etishlarini so'raymiz.

Manzil: Samarqand shahri Bog'dod ko'chasi, 1-uy, 3-xona.

Samarqand shahrida xususiy amaliyot bilan shug'ullanuvchi notarius Yusupova Dilsura Hasanovna notarial idorasida marhum Mamatqulov Musaga (2018-yil 6-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Yusupova Dilsura Hasanovna notarial idorasiga murojaat etishlarini so'raymiz.

Manzil: Samarqand shahri Abdurahmon Jomiy ko'chasi, 64-uy.

Samarqand shahrida xususiy amaliyot bilan shug'ullanuvchi notarius Tursunov Suhrob Berdiqulovich notarial idorasida marhum Tilavov Savlat Saidovichga (2024-yil 2-iyulda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Tursunov Suhrob Berdiqulovich notarial idorasiga murojaat etishlarini so'raymiz.

Manzil: Samarqand shahri Beruniy ko'chasi, 200-uy, 3-xona.

Samarqand shahrida xususiy amaliyot bilan shug'ullanuvchi notarius Murtazayev Sherzod Sobirovich notarial idorasida marhum Xakimova Uragka (2018-yil 6-oktabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Murtazayev Sherzod Sobirovich notarial idorasiga murojaat etishlarini so'raymiz.

Manzil: Samarqand shahri Abdurahmon Jomiy ko'chasi, 64-uy.

Past Darg'om tumanida xususiy amaliyot bilan shug'ullanuvchi notarius Hamidov Norbek Komil o'g'li notarial idorasida marhum Alilikulov Xayrullo Mamaraximovichga (2023-yil 7-oktabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Hamidov Norbek Komil o'g'li notarial idorasiga murojaat etishlarini so'raymiz.

Manzil: Past Darg'om tumani Juma shaharchasi, Amir Temur ko'chasi, 48-uy.

Samarqand shahrida xususiy amaliyot bilan shug'ullanuvchi notarius Qodirova Mavluda Turanboyevna notarial idorasida marhum Xamidov Baxodir Sharipovichga (2024-yil 12-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Qodirova Mavluda Turanboyevna notarial idorasiga murojaat etishlarini so'raymiz.

Manzil: Samarqand shahri Farhod ko'chasi, 34-uy.

TA'SISCHILAR DIQQATIGA!

"Ulug'bek ICHTB" MCHJ ta'sischilarining 2024-yil yakuni bo'yicha navbatdagi umumiy yig'ilishi 2025-yil 10-mart kuni soat 10:00 da Past Darg'om tumani "Balxiyon" MFY, Samarqand shohko'chasi, 22-uyda o'tkaziladi.

KUN TARTIBIDAGI MASALALAR:

1. "Ulug'bek ICHTB" mas'uliyati cheklangan jamiyati direktorining 2024-yil yakunlari bo'yicha hisobotini tasdiqlash;
2. 2024-yil yakunlari bo'yicha jamiyat buxgalteriya balans, moliyaviy natijalari to'g'risidagi hisobotini tasdiqlash va olingan sof foydani taqsimlash;
3. 2025-yil uchun jamiyat "Biznes rejasini"ni tasdiqlash;

4. Jamiyat direktori bilan tuzilgan mehnat shart-nomasini bir yil muddatga uzaytirish yoki bekor qilish masalasini ko'rib chiqish;
5. Jamiyat ta'sischilari ro'yxatiga o'zgartirish kiritish to'g'risida;
6. 2025-yilda 1960-1961-yillarda qurilgan eski binolarni buzib, yangi binolar qurish va qaytadan rekonstruksiya qilish masalalari to'g'risida.

JAMIYAT MA'MURIYATI.

Jismoniy tarbiya va sport bo'yicha mutaxassislarni qayta tayyorlash va malakasini oshirish instituti Samarqand filiali

TANLOV E'OLON QILADI!

Katta o'qituvchi lavozimiga: Jismoniy tarbiya, sport nazariyasi va uslubiyati kafedrasiga.

Tanlovda ishtirok etishni istaganlar quyidagi hujjatlarini taqdim etadilar:

Filial direktori nomiga ariza, yashash joyi ko'rsatilgan pasport nusxasi, kadrlarni qayd qilish shaxsiy varaqasi, oliy ma'lumot haqidagi diplom nusxasi. Qatnashuvchilarda ilmiy daraja, ilmiy unvon, shuningdek, ilmiy ishlar va ixtirolar mavjud bo'lgan taqdirda ularga tegishli diplomlar, attestatlar

nusxalarini, malaka oshirish haqidagi sertifikatni taqdim etishlari kerak.

Eslatma: Tanlovda ishtirok etish uchun arizalar e'lon chop etilgan kundan boshlab bir oy davomida qabul qilinadi.

Manzil: Samarqand shahri Cho'pon ota ko'chasi, 13-"A" uy.

Telefonlar: +99866-236-21-28, +99893-357-74-95.

Electron manzil: samfilial@exat.uz

TOPGANGA MUKOFOTI!

Jizzax viloyati Jizzax shahridagi "ISHTIXON TRANS SERVIS" mas'uliyati cheklangan jamiyatiga qarashli davlat raqami 30 854 ZAA bo'lgan "MAN CLA 37 280 8 4 BB CS100UX U18C" yuk mashinasining texnik pasporti Ishtixon tumani hududida yo'qolgan. Ushbu hujjatni topganlardan mukofot evaziga qaytarishlarini so'raymiz.

Telefon: +99895-173-53-13.

BEKOR QILINADI

Past Darg'om tumanidagi 15-o'rta maktabdan (hozirgi 95-umumiy o'rta ta'lim maktabidan) 1987-yilda Allayorov Doniyor Xoliyovovich nomiga berilgan D 380462 raqamli o'rta ma'lumot to'g'risidagi attestat yo'qolganligi sababli bekor qilinadi.

"Zarafshon" va "Самаркандский вестник" gazetalarini tahririyati jamoasi tahririyat shahrishtatsi xodimi Galina Shulgaga o'g'li

Anatoliy SHULGANing vafoti munosabati bilan ta'ziya izhor etadi.

"Nazorat kuchli ekan", "Ayollarning erkak hamrohsiz kirishi mumkin emas", "Hududida musiqa qo'yish yoki tinglashni man qilish talab qilinibdi". Ikki qo'shni xalq – o'zbek va afg'onlar o'rtasidagi do'stlik, samimiyat va hamkorlik belgisi sifatida bunyod etilgan Termiz xalqaro savdo markazi atrofida yana qanday gap-so'zlar bo'lmadi, deysiz. Xo'sh, ular qanchalik haqiqatga yaqin? Samarqanddan Termizga, xalq tilida "afg'on bozori" nomi bilan mashhur o'sha markazga borish osonmi yoki qiyin? U yerda nimalarni xarid qilish mumkin? Buni aniqlash uchun Surxondaryoga yo'l oldik.

SAMARQAND – QASHQADARYO – SURXONDARYO

Ozgina geografiyaga to'xtalamiz. Surxondaryo viloyati respublikamizning janubi-sharqidagi Surxon-Sherobod vodiysida joylashgan bo'lib, janubdan Amudaryo bo'ylab Afg'oniston, shimol, shimoli-sharq va sharqdan Tojikiston, janubi-g'arbdan Turkmaniston bilan chegaradosh. 20,1 ming kilometr kvadrat maydonining asosiy qismi, relifi tog' va tekisliklardan iborat. Surxondaryo va Sherobodaryo oqib o'tadigan tekislik shimol, g'arb va sharqdan baland Hisor tizmasi va uning tarmoqlari bilan o'ralgan.

Aytilganidek, safardan maqsad bir nuqtadan ikkinchi nuqtaga borib, bozorni ko'rib qaytish emas, balki unga borish yo'lining "past-baland"larini ko'rib, taassurotlarimizni o'rtoqlashish edi. Shu bois yo'lga yengil avtomobil bilan chiqdik.

Transportimiz Samarqand shahridan kunduzgi 9:00 larda harakatlandi. Yo'l boshlovchi ilova Termiz shahrigacha 370 kilometr masofa borligini ko'rsatadi. Samarqand tumani orqali Qarshi yo'lga tushib oldik. Magistral yo'l sizni to'g'ri Termizga olib boradi. Agar yo'lga to'xtamasangiz, 7 soatlik masofa. Ammo buning deyarli iloji yo'q. Ayniqsa, Qashqadaryo tog' tizmalari, qir-adirliklarining go'zalligiga mahliyo bo'lib, yo'ldan qolganingizni payqamay qolasiz. Yo'l yoqalab joylashgan savdo shoxobchalaridagi turli noz-me'matlardan (qish bo'lishiga qaramay, istagan mahsulotingizni topasiz) tatib ko'ringiz keladi. Odamlarining samimiyatidan ko'nglingiz yorishadi.

Hozirgina palakdan uzilgandek turgan tarvuzni ham shu yo'lga uchratdik. Qashqadaryoning Chiroqchi tumanidagi Galabek qishlog'ida yashovchi dehqonlar qishning chillasida ham, ko'klamda ham tarvuz sotishadi.

— Bizda tarvuz oktabr oyining 5-10-sanalarida yig'ishtirib olinadi, - deydi Bayman ota Hasanov. — Keyin tepaliklardan yerto'la qazimiz. Yerto'laning ichki qismi kengaytirilib, xandak hosil qilinadi. Tarvuzlar shu xandakka solinib, usti tuproq bilan qoplanadi. Ular uzoq vaqt sifati buzilmay turishining boshqa biror siri yo'q. Ota-bobolarimiz shunday qilishgan, biz ham. Balki yerimizning o'ziga xos xususiyati bordir. Lekin bizning tajribani qo'llagan boshqa hech yerda tarvuz bunchalik yaxshi saqlanganligini ko'rmadim.

Bayman ota yerto'lalari da 10 mingta tarvuz ko'mgan ekan. Hosilning asosiy qismini sotib bo'libdi. Uning aytishicha, boshqa viloyatlardan atay tarvuz olish uchun keladigan odamlar ham bor. Kimdir dardman yaqini uchun, boshqalar homilador xotinini yo kelini uchun yo'l bosib keladi. Lekin shu vaqtgacha hech kim quruq qo'l bilan qaytmagan ekan. Otaxonning o'zi kuni 50 tagacha tarvuz sotayotganini aytdi. Narx masalasiga kelsak, insof sari baraka, katta-kichikligiga qarab 10 ming so'mdan 25 ming so'mgacha tarvuz topasiz.

YORQIN RANGLARGA BURKANGAN TOG'LAR

Surxondaryo nomining kelib chiqishiga oid turli farazlar bor. Lekin bu farazlarning deyarli barchasida nom tarjimasida "qizil" so'zi ishlatiladi. Xususan, O'zbekiston joy nomlari izohli lug'atida Surxondaryo dastlab, ehtimol, Surxob, deya atalgan, deyiladi. Forschadan tarjima qilinganda "qizil daryo" degani.

Bu nom unga naqadar mosligini Surxondaryoda bo'lganlarga tushunadi. Qashqadaryoni chegaralab, Surxon vohasiga kirib borarkansiz, tog'u toshlar, yering rangi ham o'zgarib borayotganligiga guvoh bo'lasiz. Ayniqsa, osmon bilan bo'yashgan tog'larning turli ranglarda jilolanishi kishini hayratga soladi. Bu ranglar ichida qizil rang ustunlik qiladi, albatta. Shu bois ham undan oqib tushuvchi jilvalar qizg'ish bo'lib, atrofga o'ziga xos ulug'vorlik baxsh etib turadi.

Aynan shunday taassurotlar bilan Surxondaryoning mashhur Sherobod anor bozoriga yetib keldik. Magistral yo'l yoqasida joylashgan bu bozorcha o'zining qizimzi anorlari bilan mashhur.

AFG'ONISTON CHEGARASIDAGI BOZOR

UNGA BORISHINGIZ UCHUN BESH TA SABAB BOR



— Shu tumanning Tarog'li mahallasida turaman, - deydi Ismat Sanayev. — Mahallamizda barcha anor yetishtirish bilan shug'ullanadi. Shaxsan o'zimdada 15 sotixda

150 tup anor bor. Ulardan har yili 5 ton-nagacha hosil olaman. Bizda anorlar sho'r suv ichadi. Shuning uchun bo'lsa kerak, ta'mi o'zgacha totli, saqlanishi ham yaxshi. Oilam bilan bir kunda 3 million so'mgacha savdo qilaymiz. Yo'lovchilar doim bozorchamizga to'xtab o'tadi.

Anor bozorining atrofi gavjum. Odamlar anorlarni shu yerning o'zida tatib ko'rishga oshiqadi. Biz ham bu imkoniyatni qo'ldan boy bermadik. Haqiqatan anorning mazasi og'izda qoladigan.

Harakatni davom ettirarkanmiz, navbatdagi tabiat mo'jizasi — xorij kinolarida ko'rganimizdan ham chiroyli kanyonlar bizni qarshiladi. Bu betakror manzaraga boqib, o'z yurtimiz, uning go'zal tabiati haqida deyarli hech nimani bilmasligimizni angladik. Ko'plab kilometrarga cho'zilgan bu qizil kanyonlarning o'zi har qanday sayohatni lo'qoldirishi turgan gap.

Alohida e'tirof etilishi kerak bo'lgan yana bir jihat, bu Surxondaryodagi deyarli barcha ko'chalarning ravonligidir. Buni ayniqsa, haydovchilar juda qadrlashadi. Yo'llar tekisligi bir qulaylik bo'lsa, ularning kengligi yana bir qulaylikdir. Xullas, ikki kun vohada, tor yo'li xizmatini o'tab, ilma-teshik bo'lgan ko'chani ko'rmadik. Holbuki, magistral yo'lining Dehqonobod (Qashqadaryo) tumanidan o'tuvchi qismida bo'larimiz bo'lgandik.

KO'CHALARDA ODAM KAM

Termizga kech tushganda kirib keldik. Mehmonxonalar ko'p, joylashish qiyin bo'lmadi. Lekin Termizning tungi ko'chalarga moslashish bir oz qiyin kechdi. Sababi Samarqand shahri ko'chalari yarim tunda ham gavjum bo'ladi va biz shunga o'rgangan ekanmiz. Tungi Termizni ko'rish uchun sayrga chiqqanimizda, piyoda yurgan odamlar juda kam edi. Transport vositalari ham bizdigidan karrasiga kam.

Bir tarafdin noqulay bo'lasiz, ikkinchi tarafdin halovatni his qilasiz. Tungi sokinlik kunduz kuni ham ko'p buzilmaydi.

Ma'lumotlarga ko'ra, Termiz so'zi Tarmita, u esa qadimgi baqtr tilidagi "taramastxa" (taro maetha) so'zidan olingan bo'lib, "daryoning narigi qirg'og'idagi manzilgoh" ma'nosini anglatadi. Ba'zi manbalarda Termizning tarixi miloddan avvalgi davrlarga bog'lanadi. Bu qadimgi manzilgoh hozir yurtimizning eng janubiy qismida joylashgan shahardir. Va uning tarixi doim Amudaryo va daryoning narigi qirg'og'ida yashovchi xalqlar bilan uzviy bog'liq bo'lgan.

Bugun ham Termiz ko'chalari afg'onistonlik qardoshlarimizni ko'rishingiz mumkin. Aytganimizdek, mehmonxonalar ko'p va ularning doimiy mijozlari orasida qo'shni xalq vakillari ham bor. Bilishimizcha, keyingi yillarda afg'onistonlik tadbirkorlar Termizda ham qator loyihalarni amalga oshirib, ikki davlat o'rtasidagi o'zaro iqtisodiy hamkorlikni rivojlantirishda faol ishtirok etishmoqda ekan.

BOZORGA KIRISH OSON, CHIQUISH QIYIN

Safarimizning ikkinchi kuni Termiz xalqaro savdo markaziga yo'l oldik. O'zbekiston va Afg'oniston chegarasidagi Hayraton ko'prigi yaqinida qurilgan savdo majmuasiga birgina pasport yoki ID karta yordamida

rasmий qayddan o'tib kirasiz. Transportda bo'lsangiz, bojxona ko'rigidan o'tkaziladi, bunda ham muammo yo'q. Xuddi shunday afg'onlar bu markazga vizasiz, faqat pasport bilan kirishadi.

Bozorda ikki davlat fuqarolari uchun mehmonxonona, shifoxona, tamaddixonona va boshqa xizmat ko'rsatish shoxobchalari bor. 120 gektar yerni egallagan majmuada 500 tacha do'kon borligi aytiladi. Bugungi kunda bu do'konlarning deyarli barchasi egali, savdo esa avjida.

Biz markazga kirib borarkanmiz, unda mahalliy aholidan ko'ra afg'onistonliklarning ko'p ekanligi e'tiborimizni tortdi. Ko'pchilik savdo bilan band, yana kimlardir yashil maysozarda, quyosh nurida chordona qurib o'tiribdi, boshqalar o'rindiqlarda farzandlari bilan hordiq chiqaryapti. Va asosiysi, barcha muloqotga ochiq, samimiy suhbat yoki intervyu berishdan hech kim qochmaydi.

Do'konlarni aylanar ekanmiz, bu yerda ham shunday muhitni ko'rdik. O'zbek va afg'on sotuvchilari yonma-yon, qo'shni do'konlarda savdo qilishmoqda. Afg'on do'konlarida barcha sotuvchilar o'zbek tilini yaxshi biladi. Bemalol mahsulot narxiga tortishishingiz, xullas, o'zimizdagidek jaydaricha bozor qilishingiz mumkin.

— Bu bozordan do'kon ochganimizga 4 oycha bo'ldi, - deydi Mozori Sharifdan kelgan Shermuhammad Nazariy. — Ikki ta do'konni olganmiz, har ikkisi asosan afg'on milliy kiyimlari, gilamlarini sotamiz. Ularni o'z sevimizda ishlab chiqaramiz. Savdo kun sayin yaxshilanib boryapti.

Yana bir afg'onistonlik Hamid ismli sotuvchi urgutlik tadbirkorlar tomonidan yuritilayotgan do'konda sotuvchi bo'lib ishlashini aytdi. Ular taklif qilayotgan uy-ro'zg'or buyumlari, elektron texnikalar har ikki tomon xaridorlari uchun qiziq ekan.

— Afg'onistonga elektron texnikalar asosan Xitoy va Pokiston orqali kirib keladi, - deydi u. — O'zbekistondan juda kam. Do'konimizga kelganlar bu yerda mahsulotlar ancha arzon ekanligini aytishmoqda. Xaridorlar soni ham shunga mos ravishda ortib boryapti. Hamyurtlarim asosan isitish pechlari va sovutkichlarga qiziqish bildiriyapti.

— Besh oydan beri shu bozorda oziq-ovqat do'konini yurityapmiz, - deydi Toshkent shahridan kelgan tadbirkor Dadaxon O'rinboev. — Asosiy maqsadimiz mahsulotlarimizni afg'onistonlik xaridorlarga tanishtirish. Ularning ehtiyoj va takliflarini o'rgangan holda mahsulot eksportini yo'lga qo'ymoqchimiz. Markaz afg'onistonlik tadbirkorlar bilan hamkorlikni yo'lga qo'yish uchun ham muhim minbar hisoblanadi.

Sotuvchi va xaridorlar bilan muloqot davomida aniq bo'ldiki, Afg'onistonga boshqa davlatlardan eksport qilinayotgan mahsulotlarning ayrimlari bozordagidan ancha arzon. Shunga qaramay, ular O'zbekiston mahsulotlarini afzal ko'rishmoqda. Buning asosiy sababi ularning sifatida ekanligi aytiladi. Ya'ni, bizning mahsulot

sifatliroq. Shuningdek, ayrim oziq-ovqat mahsulotlari, xususan, tuxum Afg'onistondagidan ancha arzon. Shu bois aksar afg'onistonlik xaridorlar boshqa yumush bilan kelsa-da, qaytishda tuxum olib ketishadi.

Texnika masalasiga kelsak, afg'onistonlik xaridorlarning aytishicha, Afg'on chegarasida uning kilogrami hisoblanar ekan. Har bir odamga ma'lum kilogramm yukni o'tkazishga ruxsat beriladi. Shu bois katta texnika, jumladan, muzlatkich olish uchun bir oiladan 3-4 kishi keladi. Bu uning vaznini o'rtada teng bo'lish imkonini beradi.

Bozorni bir kunda aylanib chiqish qiyin, ayniqsa, biz uchun afg'onistonliklarning do'konlarini chetlab o'tish qiyin bo'ldi. O'zingizni Afg'onistonda yurgandek, sayyohdek his qilasiz. Shuning uchunmi, bozorni tark etgingiz kelmaydi.

AFG'ON BOZORINI KIM "EGALLAYDI"?

Endi bu bozorning ahamiyati haqida to'xtalsak. Ma'lumki, taxminan 40 million aholiga ega va uning qariyb 45 foizi qishloq xo'jaligida band bo'lgan Afg'oniston bugun ko'plab davlatlar uchun jozibali bozor hisoblanadi. Uzoq yillik notinchliklardan so'ng dunyoga ochilish, savdo-sotiqni rivojlantirish afg'onlarning o'zi uchun ham muhim, albatta. Ammo bu yurtda hali sanoat rivojlanmagan, 20-30 milliard dollarlik iqtisodiyotga ega katta bir mamlakat hozir asosan importga bog'lanib qolgan. Ekspertga quritilgan meva, dorivor o'tlar, foydali qazilmalar, sabzavotlar, jun, paxta va boshqa sanoqli mahsulotlar chiqariladi, xolos.

Ma'lumotlar keyingi yillarda mamlakatning asosiy savdo hamkorlaridan biri - Pokiston bilan o'zaro savdo hajmi pasayganini ko'rsatmoqda. Bu esa yangi yo'nalish — O'zbekiston, Qozog'iston, Hindiston va Xitoy bilan savdo aloqalarini kengaytirishni taqozo etadi. Xususan, O'zbekiston bugun Afg'onistonga asosan maishiy texnika, oziq-ovqat (ayniqsa, tuxum), turli sanoat mahsulotlari, un, bug'doy va sement yetkazib bermoqda.

Bu hamkorlikda O'zbekistonning eksport ulushi 90 foizdan oshdi. Ya'ni, importyor Afg'oniston hisoblanadi. Shunga qaramay, afg'on bozori hali ham to'g'ri ma'noda "och" deyish mumkin. Bu bozordan muqim o'rin olish endi avjiga chiqmoqda.

Shularni tahlil qilsangiz, yuqorida tani-shilgan bozorning har ikki tomon uchun ham nechog'lik ahamiyatli ekanligini anglaysiz.

Bunday savdo yo'nalishlarini yanada kengaytirish zarurligini tushunasiz. Tadbirli ishbilamonlarimiz bu yo'nalishda allaqachon harakatni boshlagan. Ammo ba'zilar hali ham o'yda.

Aytish joizki, afg'on xalqi dunyoga ochilishga harakat qilgan ekan, kommunikatsiya tarmoqlari ham kengayib boraveradi. Jarayonda o'z muqim o'rnimizga ega bo'lishimiz esa nafaqat iqtisodiy, balki siyosiy jihatdan muhim hisoblanadi. Buni raqobatchilarimiz yaxshi bilishadi. Shu bois ham O'zbekiston, Afg'oniston va Pokiston o'rtasida qurilishi kerak bo'lgan transafg'on temir yo'li loyihasi necha yillardan beri dunyo diqqat markazida turibdi. Agar bu loyiha amalga oshsa, o'zaro savdo hajmi hozirgidan yuzlab baravarga ortishi mumkin. Bu ham yaqin kelajakda yangi maqolamizga mavzu bo'ladi, degan umiddamiz.

Xulosa qilib aytganda, Surxondaryodagi ayni bozor bugun ikki xalq o'rtasidagi do'stona munosabatlar va tijoriy hamkorlikning amaliy ifodasi hisoblanadi. Uning atrofidagi gap-so'zlar esa fuqarolarimiz, xususan, tadbirkorlarda ham u haqda noto'g'ri tasavvur shakllanishiga sabab bo'lmoqda. Biz bozorda bo'ldik va boshqalarga ham uni o'z ko'zlari bilan ko'rishni tavsiya qilamiz. Qolaversa, Surxondaryo ham sayyohlarini zeriktirib qo'ymaydi.

Anvar MUSTAFOQULOV,
Asqar BAROTOV,
"Zarafshon"ning maxsus muxbirlari.

(Samarqand – Qashqadaryo – Surxondaryo – Samarqand)



MUASSIS: Samarqand viloyati hokimligi

Bosh muharrir: Farmon TOSHEV

Gazeta O'zbekiston matbuot va axborot agentligining Samarqand viloyat boshqarmasida 2012-yil 30-martda 09-01 raqam bilan ro'yxatga olingan. Nashr 100. Indeks 438. 14 246 nusxada chop etildi. Buyurtma 91. Hajmi 2 bosma taboq, bichimi A-2

Gazeta haftaning seshanba, payshanba va shanba kunlari chiqadi.

QABULXONA: (66) 233-91-51, REKLAMA VA E'LONLAR: (66) 233-91-56

BO'LIMLAR: (66) 233-91-57, 233-91-58, 233-91-59, 233-91-61

MANZILIMIZ: 140100, Samarqand shahri, Ulug' Tursunov ko'chasi, 80-uy, Matbuot uyi.

Gazeta «Zarafshon» tahririyatining kompyuter bo'limida sahifalandi.

«Noshir lux» MCHJ bosmaxonasida chop etildi.

Korxonalar manzili: Samarqand shahri, Spitamen ko'chasi, 270-uy.

Bosishga topshirish vaqti:

soat 18:30 da.

Bosishga topshirildi:

soat 19:00

Navbatchi muharrir:

A.SHERXOLOV.

Navbatchi:

G.MO'MINOVA.

Sahifalovchi:

B.ABDULLAYEV.



Saytimizga o'tish uchun QR-kodini telefoningiz orqali skaner qiling

ISSN-201667X



9 1 7 7 2 0 1 0 6 6 7 0 0 9

Sotuvda narxi kelishilgan holda